

Ambiente Festival di Tumba



ORANJESTAD (AAN)- Diasabra marduga den careda di Sor Aruba a conoce su Rey di Tumba y alavez e tumba di carnaval 1988 den persona di e decano tumbero Don Juancho Kock cu su tremendo Tumba "Un Biaha Mas". E poco mil almanan cu a keda den Don Elias Mansur Ball Park a keda contento cu e desicion di e juradonan. Juancho tabata e ultimo cu a canta y el a pone delaster un alma move den ball park. No tabata tin duda cu Juancho a pone tur hende ariba abao ora cu el a cuminsa basha su tumba acompaña pa Grass

Hopper.

Juancho a bolbe haci un cos grandi y asina logra su di ocho titulo Rey di Tumba. Juancho Pabien un biaha mas.

Di e 38 tumbanan cu a ser presenta mester bisa cu tempo a hunga un factor masha importante den preparacion di e tumbanan y como tal tabata tin hopi tumba cu no por a anota punto halto di e juradonan y asina yega den e finalistanan.

Tabata tin bon composicion, y bon cantante, areglistanan a haci bon trabao, pero hopi vez tabata tin fayó di sea e cantante of e banda musical cu a kibra un bon tumba na caminda.

E tumbanan cu sin duda a lanta e publico tabata masha limita. Bon banda musical cu hopi fanatico a bida cu sea e tumba ta bon of malo, pero e bandanan chiquito cu mes a ser spera di nan a duna bataya te na final.

Di e 38 tumbanan cu a ser presenta, mester menciona cu 12 tabata ariba un nivel pa ser un tumba ganador, 10 ta tumba medio y e otronan tabata simplemente hopi abao.

E prome tumba cu a lanta e publico tabata esun di Hubert Ignacio 'Carnaval Ban Sigui' un areglo di Chenchó Kelly, un tremendo tumba sin duda. E otro tumba bon tabata di Oslin Trimon 'Klap den Man' bon acompañamento y un areglo hopi bon cera di Martin Qandus. Ambos cantante a ser acompaña pa La Nueva Fuerza.

E agrupacion "Nice" a presenta un bon tumba cu sin duda hopi a kere cu lo e yega final. Ta trata aki di e tumba

'Bira Rond' canta pa Victor Noore y aregla pa Tony Tania.

Ruben Croes a bolbe yega hopi leeuw, pero no a logra e clasificacion pero si a laga un bon tumba resona cu ta 'Carnaval ta bin bay' cu ta un areglo di Tarzan Jimenez y agrupacion Selecccion Musical.

Clara Del Dia a haci un tremendo presentacion cu un tumba cu no a laga ningun duda cu ta un tumba ganador. Clara a lanta e publico ponenan den un fiesta di zwaai. Clara su tumba tabata tremendo y su acompañamento tabata hopi bon pa "Los Bravos" di Hulanda. E tumba yama 'Ban Zwaai Den Carnaval' un composicion di Segundino Tromp y areglista Efi Thiel.

E damita di The Aruban Band, Diana Emerencia a anota hopi halto pa e publico cu un tumba di kita sombre. Diana a pone e publico bida enormemente cu e tumba aki.

No tabata tin duda cu e ritmo di tumba di Papito y su Doble Sabor tabata hopi bon, pero e no a logra anotacion halto pa tur su cantantenan. E mihor nan di e banda aki tabata di Juny De Freitas 'Iskrim di Cartuchi' un areglo di Federico Martis. Esun di Ito Dania tabata hopi bon mes, 'Tur cos ta Kla' un composicion di Casin Giel y areglo di Franklin Granadillo.

E tumba di Inky cu Musical Time tabata otro tumba cu a pone e publico move, un tremendo tumba 'Bim Bam Ate' composito y areglista Eddy Bennet. Tatoo su tumba tambe tabata bon y mas ainda su areglo tabata tremendo di Hildward Croes.



Didi Wernet su tumba tabata un joyas di kita sombre y tabata un tumba cu tur cos aden pa bira un tumba ganador. E tumba 'Kinipie' un composicion di Didi y areglo di Hildward Croes.

Chicho Kock su tumba tabata bon, pero no un di su mihor nan cu el a yega di presenta cune. E tumba 'Lagele Aden' tabata di Chicho y areglo di Hildward Croes.

Grass Hopper tabata tin 4 tumba, e mihor di e banda aki

tabata esun di Rafael Flanders 'Respete' un composicion di Casin Giel y areglo di Franklin Granadillo.

E tumba mas mihor di e banda aki tabata nada menos cu 'Un Biaha Mas' di Don Juancho Kock cu a bira e tumba ganador, un composicion di Juancho mes y tremendo areglo di Federico Martis.

E siete finalistanan pa enfrenta Antiyas ta, Juancho Kock, Chicho Kock, Didi Wernet, Ito Dania, Tatu, Carla del Dia y Oslin Trimon.

TUMBA CONTEST ARUBA - ANTILLAS

DIA : 24 JANUARI 1989 - DIAMARS
LUGAR: "MARLBORO BALLPARK"
HORA : 8.00 p.m

TICKETS: Dialuna henter dia na oficina di SAC
DIAMARS: di 2'or padilanti na:
Marlboro Ballpark

Entrada: Solamente Fls.10,--

